

LA RECLAMAZIUN

da Chatrina Josty



Punts 178, 06-2009, p. 7

Cura che Alina Cadonau è vegnida salidada per la 10avla giada quel di cun ils plets «Vossa huara banca da merda, da laders, embrugliaders, engianaders, cogas dad Ospelianers» dad in client ch'è vegnì al fanestrigl da la banca gronda per prender giu ses raps dal conto, n'ha ella betg respundì sco tar ils nov auters clients, ch'eran vegnids entaifer la medem'ura, cun ils plets quietants: «Vus stuais perdunar ils sbagli che nosa banca ha fatg, ma Vus pudais tuttina anc avair fiduzia, Voss raps èn en buns mauns.»

Empè da dir quests plets ha Alina avert cun moviments da roboter la cassa per prender ora ils raps ch'il client ha pretendì. Ella ha mess ils raps en il guaffen per stumplar sut il fanestrigl ora ed è restada pitgada per in batterdegl, in batterdegl, cura ch'ella pareva sco inbetunada en sia blusa alva, sias novas chautschas alvas da glin, ses dress per lavurar la stad en las chaliras a l'intern da la banca che na permetta nagina mongia curta.

Sut las mongias e las chautschas dad Alina hai dà moviment, il sang da las chommas, dal venter, gea perfin quel da la bratscha è passà tras las avainas ensi ed è sa rimnà en ses chau.

Sch'il client na fiss betg stà occupà talmain cun sia ravgia, avess el badà tge che capita ed el avess pudì scappar u almain sa sgobar avant ch'Alina explodeschia.

Il chau cun ils bels chavels blonds è ì en milli tocs ed il sang ch'era sa rimnà en il chau è sorti cun gronds squits sco or d'ina funtauna en per il fanestrigl e sin las bancnotas ch'Alina tegneva enta maun. Squits da sang èn perfin rivads sut il fanestrigl ora ed han maclà la chamischa dal client ch'aveva avert en il mument da l'explosiun la bucca per reclamar che quai giaja memia ditg cun dar or ils raps.

Cun bucca averta e chamischa maclada è il client stà là enfin ch'il schef da la banca è vegnì per al trametter davent, senza emblidar d'al smatgar en maun ses raps ed ina buttiglia vin cotschen sco indemniziun per l'experiencia ordvart dischagreabla ch'el ha stuì far ses ultim di sco client da la banca gronda.

**«Sche in cinic di ad in realist
ch'el saja in romanticher.»**

(Martin, 24, cineast)

